

9/03/2025

Aizawl

2:30pm

REGIONAL NEWS

CADC VC POLLS

Chakma Autonomous District Council (CADC) huam chhunga village council inthlan lo awm turah inthlan buaipuitu turte'n vawiin khan Chawngte an pan.

CADC) huam chhunga tun kar Nilaini a VC inthlan vote thlak tur atana inbuatsaihna kal zelah vawiin khan Returning Officer (RO) leh venhimna lam buaipuitu tur te'n Lawngtlai chhuahsanin Chawngte an pan a, vawiina chhuakte hi - Returning Officer (RO)-88 leh Security Official - 88 an ni a. Zing dar 9:30 atangin district bawrhsap pisa atanga chhuak tanin, dar 11:00 khan Chawngte hi an pan fel a. RO, ARO, PO leh Security Official- te hian naktuk March ni 10 hian Chawngte ah training an huaihawt leh ang a, chumi hnuah an duty - na tur hmun theuh an pan tawh dawn a ni.

CADC huamchhungah hian VC 88 awmin, Seat - 516 a awm a, mipa vote nei mi- 19,162 leh hmeichhia vote nei mi- 18,721 awmin, a vaiin vote nei mi- 37,883 an awm a ni . Ni 12, March ah vote thlak a ni ang a, hemi ni vèk hian vote chhiar nghal a ni ang.

<><><>

DEAD BODIES

Social Welfare, Tribal Affairs, Women & Child Development minister Pi Lalrinpuui chuan sorkarin mitthi ruang phurh chu nikum September ni 1 atanga kalpuuin kumin February ni 17 thleng khan mitthi ruang 369 phurh a nih tawh thu Assembly a hrilh.

MNF member Pu Lalchhandama Ralte zawhna ziaka chhangin Pi Lalrinpuui chuan mitthi ruang 369 phurh man hi cheng nuai 36, sing 6, sang 7 leh 18/- dawn a nih tawh thu a sawi a. Mitthi ruang 320 phurh man cheng nuai 31, sing 4, sang 8, leh 314 pek chhuah tawh a nih thu leh ruang 49 phurh man cheng nuai 5, sing 1, sang 8 leh 704 pek tura ruahman mek a nih thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.

<><><>

ODOP

Sawrkhar laipui ruahmanna, ODOP (One District One Product), "District khat, thar chhuah chi khat" tih hnuaiah Lunglei District balhla tihlar zel a ni.

Chapchar Kut lawmna-ah pawh khan kut hmangtu mipuite tan sawrkhar department, pawl leh mimal te'n dawr chi hrang hrang hawngin, he'ng zingah hian District Horticulture Office chuan One District One Product (ODOP) stall an hawng a. He ODOP dawrah hian Lunglei a balhla aṅanga thil siam chhuaktute'n balhla aṅanga thil siam chi hrang hrang - in chi (banana juice), kamram (banana chips), chhangphut (banana flour) leh a

dangte tlawm taka lei theih turin an chhawp chhuak a. He'ng ei leh in, thianghlim leh hrisel tak tak chhawp chhuahte hi kut chhimtute pawhin an hlut hle niin sorkar thuchhuah chuan a tarlang.

Hun hrang hrangah sawrkar thuneitute, mi pawimawhte leh khual thate an lo kal changin anmahni lo lawm na'n thilpek lo hlan thin a ni a. Heti'ang nikhua hian Lunglei District-a khual thate lawmna thilpek atan district ODOP balhla leh balhla atanga thil siamte lo hlan thin ni se an ti a, ODOP hma lakna hnuaia ruahman a nih angin, hun eng emaw lai atang khan balhla leh balhla atanga thil siam chi hrang hrangte chu thilpek atana inhlan chin chhoh a ni a. District ODOP chawi lar nan leh balhla hmanga ei zawna tihmasawn na'n he thil hi chhunzawm zel tum a ni .

ODOP hnuaiah hian Lunglei District chhunga balhla thar chhuah leh balhla atanga thil siam chhuah tipung tur te, balhla chingtu leh balhla hmanga thil siam chhuaktu tam zawk an awm theihna tur leh hmanraw mamawh leh a hralhna tha zawk a awm zel theih nan te hma lak chhoh zel tum a ni bawk.

<><><>

MIZORAM ECONOMY

Mizoram sum thawhchhuah (gross state domestic product - GSDP) chu za zela 11.6 pung tura chhut a ni a, hmasawna hi chak takin a kal niin Economic Survey 2024-2025 chuan a tarlang.

Nilaini kal ta a finance changtu chief minister Pu Lalduhoma'n Assembly a a pharh Economic Survey-ah hian kum 2023-24 tangka kum chhunga Mizoram thawhchhuah thanna hi a vai-in za zela 9.89 ni tura chhut a ni bawk a. Buh leh bal leh thlai thar chhuah lam agriculture & allied sector) a sum lakluh a pung a, thil siamchhuahna lam (industry)-ah a pung bawk a. Buh leh bal leh thlai thar chhuahin Mizoram sum thawhchhuah a a tum ve zat chu 2024-2025 tangka kum chhung khan za zela 20 point 55 a ni a, a hma kum khan za a 20 point 45 nia sa chhut a ni. Thil siamchhuahna lamin sum thawhchhuaha a thawhve zat chu za zela 32 point 68 atangin za a 34 point 21-ah a pung chho a. Sorkar hnathawk, hotel leh service dang dang thawhchhuah hi za zela 46 point 87 atangin za a 45 point 24 ah a tlahniam chungin sumdawna leh zinmite hnen atanga sum lakluh a pung nasa tho niin Economic Survey chuan a tarlang a ni.

<><><>

ICC TROPHY FINAL

Kum 2025 ICC Champions Trophy final, India leh New Zealand-ten Dubai-ah an khel tan a, India Team hian hneh loh nei lovin final hi an lut a ni. India hian Cricket-a khawvela inelna pui ber Champion Trophy hi tum hnih, kum 2002 leh 2013-ah te a lo la tawh a ni.

<><><>